



Broj: 01,02,03,03/11-05-1-2245/17
Sarajevo, 29.12.2017.

Izvještaj
o učešću delegacije Parlamentarne skupštine Bosne i Hercegovine
na Parlamentarnoj konferenciji o WTO-u,
Buenos Aires, 9.-12.12.2017.

Delegacija Parlamentarne skupštine u sastavu: Ognjen Tadić, predsjedavajući Doma naroda PSBiH, Šemsudin Mehmedović, predsjedavajući Komisije za vanjsku trgovinu i carine Predstavničkog doma PSBiH, i Predrag Kožul, predsjedavajući Komisije za finansije i budžet Predstavničkog doma PSBiH, učestvovali su u radu Parlamentarne konferencije o Svjetskoj trgovinskoj organizaciji (WTO) koja je bila održana od 9. do 12.12.2017. u Buenos Airesu.

Konferenciju su prigodnim obraćanjem otvorili: Emillio Monzo, predsjednik Predstavničkog doma Parlamenta Argentine, Gabriela Cuevas Barron, predsjednica Interparlamentarne unije, Mairead Mc Guinness, prva potpredsjednica Evropskog parlamenta, Xavier Carim, predsjedavajući Generalnog vijeća WTO-a, Jorge Faurie, ministar vanjskih poslova Argentine, Susanna Maicorra, predsjedavajuća 11. ministarske konferencije WTO-a, i Marta Gabriela Michetti, predsjednica Senata Argentine.

U obraćanju govornika na inauguralnoj sesiji Konferencije iskazana je spremnost da skup parlamentaraca u Buenos Airesu preraste i dobije novu, parlamentarnu dimenziju WTO-a. Time bi se uspostavio nadzor nad aktivnostima WTO-a, promovirajući efikasnost i pravičnost djelovanja u skladu s ciljevima WTO-a utvrđenim i postavljenim na ranijim ministarskim konferencijama.

Učesnici Konferencije iz gotovo 60 država i međunarodnih parlamentarnih organizacija iz cijelog svijeta uglavnom su isticali nastojanja da se osigura slobodna i pravična trgovina, korisna za sve ljude u svijetu, te unaprijedi razvoj ekonomije i smanji siromaštvo. Mnogi od njih uputili su apele ministrima zemalja članica WTO-a da snažnije rade na osiguravanju ciljeva održivog razvoja planete, kao i na zaštiti okoliša. Istovremeno su izrazili potrebu za unapređenjem dijeloga između vlada, parlamenata i civilnog društva s ciljem promocije transparentnosti rada i pravila WTO-a, uspostavljanja parlamentarnog nadzora i uticaja u oblasti vanjske trgovine i vođenja razgovora u WTO-u o ključnim životnim temama.

Delegacija Parlamentarne skupštine Bosne i Hercegovine je na marginama Konferencije u Buenos Airesu imala bilateralni sastanak s Patriciom Gimenez, potpredsjednicom Predstavničkog doma Parlamenta Argentine. Tom prilikom Ognjen Tadić, predsjedavajući Doma naroda PSBiH, istaknuo je da je misija delegacije PSBiH u Buenos Airesu bila, između ostalog, da utiče na parlamentarce zemalja članica WTO-a, kao i predstavnike vodećih multilateralnih parlamentarnih organizacija u svijetu da pomognu BiH da što prije okonča

pregovore i dobije punopravno članstvo u WTO-u. U vezi s tim, predsjedavajući Tadić informirao je gđu Gimenez da BiH još uvijek vodi bilateralne trgovinske pregovore s Brazilom, Rusijom i Ukrajinom i zatražio podršku Argentine, zemlje koja ima značajnu ulogu u WTO-u. Istaknuo je da članstvo BiH u WTO-u predstavlja dokaz o ispunjavanju određenih standarda u oblasti vanjske trgovine i smatra se važnim dijelom integrativnog procesa koji našu zemlju vodi ka članstvu u EU. Obje strane konstatirale su da je potrebno saradnju između parlamenata BiH i Argentine podići na viši nivo putem angažmana grupa prijateljstva, radnih tijela i razmjenom posjeta na najvišem nivou.

Zajedno s parlamentarcima zemalja koje su učestvovala na Parlamentarnoj konferenciji o WTO-u u Buenos Airesu delegacija PSBiH učestvovala je u usvajanju završnog dokumenta kojim se apelira na usvajanje principa slobodne trgovine po pravilima jednakim za bogate i siromašne države, kojim je data puna podrška multilateralizmu kao mehanizmu nadzora i kontrole djelovanja WTO-a te posebno istaknuta uloga i značaj slobodne trgovine kao šanse za ekonomski razvoj i napredak, a ne kao prijetnje, kako je u ovom trenutku doživljavaju brojne zemlje u svijetu. Učesnici ove konferencije uputili su poruku da dijalog i zajednički rad na pitanjima sigurnosti hrane, očuvanja okoliša, jednake šanse za žene i mlade, predstavljaju najbolji način u rješavanju političke i ekonomske krize i velikih trgovinskih sporova koji potresaju današnjicu.

Nakon završetka Parlamentarne konferencije o WTO-u, članovi delegacije PSBiH prisustvovali su inauguralnoj sesiji 11. ministarske konferencije WTO-a, najvažnijem godišnjem skupu ove međunarodne organizacije u kojoj članstvo ima više od 160 zemalja u svijetu. Potom se delegacija PSBiH sastala s predsjedavajućim Radne grupe WTO-a za pregovore s BiH ambasadorom Atanasom Atanassovim Paparizovim. Tom prilikom razmijenjene su informacije o stanju pregovora Bosne i Hercegovine za punopravno članstvo u WTO-u. Konstatirano je da je BiH u završnoj fazi pregovora te da se aktivno pregovara s Brazilom, Ukrajinom i Rusijom, po čijem okončanju neće biti prepreka da BiH bude primljena u punopravno članstvo u WTO.

Zapisnik sačinila:

Mirsada Bukarić-Kovačević

Zapisnik odobrio:

Ognjen Tadić, predsjedavajući Doma naroda PSBiH

Dostavljeno:

- Kolegiju Doma naroda PSBiH
- Kolegiju Predstavničkog doma PSBiH
- Kolegiju Sekretarijata PSBiH
- Komisiji za vanjsku trgovinu i carine PDPSBiH
- Komisiji za vanjsku i trgovinsku politiku, carine, saobraćaj i komunikacije DNPSBiH
- Ministarstvu vanjskih poslova BiH
- a/a